

ARUUWEN LEGISLATURE-UN EWE MUUN CHUUK

AUNUNGATIN MWIICHENAP, AEWIN MWIICH ATAPWANAPWAN 1/85 NAMOPUNG NO. 2-118

EW NOPUNG

A forata ew Development Authority fan iten Lower Mortlocks, pwan fori atootun, tumunun, awora pochokunan, wisan me nemeneman, me pwan ren ekkoch popun.

Epwe pung me ren ewe Legislature-un, ewe Muun Chuuk.

Tetten 1. Forutan ewe Authority. Ewe Lower Mortlocks Development Authority iei a foruta fan pochokunan annukun Chuuk me Federated States of Micronesia, an epwe ew public corporation. Ewe Board non ewe Authority epwe wisen finata nenien ofesin ewe Authority.

Tetten 2. Neni Epwe Kuu ei Angang. Ewe Authority a foruta ren an epwe atufichi ekkai municipalities non Chuuk a mak fan:

- 1) Oneop;
- 2) Satawan;
- 3) Ta; me
- 4) Lukunor.

Tetten 3. Popun ewe Authority. Ewe Authority epwe nenengeni ekkewe osupwang an ekkewe neni, iwe seni an pusin tongeni, epwe angang fongon me ewe Muun Chuuk me ewe Munapen Federated States of Micronesia, pwan ekkewe pekin angangen pisinis an aramas ne efefeitai pekin angangen moni non ekkewe neni.

Tetten 4. Board of Directors.

1) Forutan. Epwe wor ew Board of Directors non ewe Lower Mortlocks Development Authority, an epwe wisen tumunu pwan nemeni ewe Authority.

2) Choon. Epwe ukukun 12 choon ewe Board. Emon seni ew me ew ekkewe municipalities mei affat non Tetten 2, repwe kefinita me ren ekkewe Council Chairmen; ekkewe state senators, me ewe national senator; ewe tupun Kepina, epwe i emon ex-officio member, esap wor an tufich ne fout, pwan ekkewe samon non ew me ew ekkewe municipalities mei affat non Tetten 2, repwe ex-officio members, esap wor ar tufich ne fout; Nge, ekkewe chon ewe Mortlocks Development Authority iei, ir seni ewe kinikin an ewe Lower Mortlocks Development Authority repwe winitai chon ewe Lower Mortlocks Development Authority tori an a much ar kewe term won ewe Mortlocks Development Authority, iwe non ena atun ekkewe Council Chairmen repwapw fini finier kewe mei affat me asan.

3) Nangatamen Fansoun Wiiser. Nangatamen fansoun wiisen ekkewe ra tupuni ekkewe municipalities epwe ukukun unungat ier, chinoon chok ewe nepoputan wis me amasowen wis mei ponuno, ewe pusin affat me ren ei annuk.

4) Aewin Mwiich. Esap mang seni 10 ran me murin ewe ran a poputa pochokunan ei Namopung, ewe Board epwe efisi an mwiich ren an epwe finata noun nouwis, pwan fori ekkoch an angang. Non an aewin mwiich, chon ewe Board re wisen tupuni ekkewe municipality repwe uttut (by lot) ren nangatamen ar repwe chon ewe Board, epwe iei usun napanapan:

- a) Ruomon repwe ew ier;
- b) emon epwe ruu ier; pwan
- c) emon epwe unungat ier.

Ewe Governor's Representative epwe wisen akkou ewe aewin mwiichen ewe Board, nge ika ese nomw, epwe ekkewe state senators, emon me neir epwe wisen ewe temporary chairman tori an a finita ewe chairman.

5) Neni mei Poon. Ew neni mei ponuno me won ewe Board pokiten mano, wees ika resign, me pwan ren met mei affat non Kinikinin-Tetten (6), epwe ammasou non chok pwan napanapan an finita me mwan. Nupwen fansoun a wor aw neni mei ponuno, ewe chairman, nge ika esenomw, ewe a tapweto murin non tettenin wisan, epwe wisen esine ngeni chon ewe Board me pwan ewe municipal government mei wenelti an epwe amasowa ewe neni.

6) Toou.

a) Chon ewe Board repwe tongeni tou seni wiser nupwen fansoun ar rese fiti mwiichen ewe Board fan unungat tettenino chok, ika seni ar rese tufich non wiser, rese fori angangen wiser, ika fofforungaw non wiser.

b) Ren an emon chon ewe Board epwe tongeni tou seni wisan, epwe ukukun unungat-ne-ruwanu (3/4) chon ewe Board meinis sin repwe tipeew ngeni non ar uttut. Porausen usun an emon epwe tou seni wisan epwe akkomw foor, esap kisiseni inik ran me mwen ar repwe angang woon ewe katou, iwe epwe affata non annukun ei Authority, epwe pwan affata meta sakkun tipis ewe aramas a fori, ika pwan chon pwarata me pisekin pwarata epwe kawor.

c) Ewe State Court non Chuuk epwe wisen nomw ren ewe pochokun ne eani ewe sakkun kapungun katou-mwan.

7) Nouwiis. Ewe Board epwe finata, seni pusin nein choon ewe Board, emon Chairman, emon Vice-Chairman me emon Secretary-Treasurer. Ewe Chairman epwe wisen nemeni mwiichen ewe Board fansoun mwiich. Nupwen i ese nomw, ewe Vice-Chairman epwe wisen nemeni, nge ika ir me ruomon rese nomw, ewe Secretary-Treasurer epwe wisen nemeni mwiich. An ewe Authority by-laws epwe pwan affata ion epwe wisen nemenem nupwen ekkewe nouwiis rese nomw.

8) Fansoun Mwiichenap. Mwiichenap epwe fis esap kisiseni fan ew non iteiten kuacheen ier, fansoun me nenien mwiich epwe finata me ren ewe Chairman non met napanapen esinesin epwe pusin affat me ren an by-laws.

9) Mwiich Atapwanapwan. Mwiich Atapwanapwan mei tongeni fis me ren chok ewe Chairman, ika pwan seni tungoreen choon ewe Board, fan pungun tipeewin ew-ne-unungatin chon ewe Board, napanapen ei sakkun epwe affat non by-laws.

10) Quorum. Epwe ukukun fomon (4) choon mwiich, ekkewe voting members, repwe nomw, iwe a tongeni fiis mwiichen ewe Board.

11) Executive Committee. Ewe Board mei pwan tongeni, fan pungun an by-laws, forata ew Executive Committee, chochoon, me pwan sakkun an angang me wisan.

12) Taropwen Mwiich. Meinsin an ewe Board me ewe Executive Committee mwiich epwe suuk ngeni aramas, nukun chok ika pwe mei wor mettoch mei mwonomwon ren porausen emon chon angang ika personnel. Ewe Secretary-Treasurer, nge ika ese nomw, emon chon ewe Board epwe pusin affat me ren by-laws, epwe wisen tumunu unusen porausen ar kewe mwiich nupwen fansoun mwiich, iwe epwe pwan tongeni mumuta an aramas repwe katon non ese nifinirin fansoun me neni, usun met by-laws epwe mutata me affata, chinoon chok ren mettoch mei mwonomwon ren porausen emon chon angang ika personnel.

Tetten 5. Pochokunen ewe Authority. Ewe Authority, non mwokutun ewe Board of Directors, epwe aani ekkei pochokun, wiis me angang:

1) Nenengeni ekkewe osupwang ren pekin moni tonong, sakkun me napanapen aar nonnomw non ekkewe neni ei Authority mei wisen tumunu, me pwan nennengeni ekkewe eoruni an ekkewe neni;

2) awora atoot ren met epwe fis ren afefeitan pekin manawen me tufichin ekkewe neni seni pusin met tufichin ekkewe neni;

3) kut moni seni pwan ekkoch pekin, ren an epwe atufichin ei angang ika atoot an ei angang;

4) fori ekkewe program me projects, noun-kewe chon angang repwe pusin fori ika fan pungun contract, menni chok sakkun ei Board a mefi pwe mei murino;

5) awora ika atononga emon Executive Director me pwan emon Budget ika Finance Officer, fori annukun choon angang, ika pwan atononga met chon angang mei mumuta me affat me ren annuk ika seni mochenin ewe Board, ren an epwe fisloch an ewe Authority kewe angang meinisin;

6) a tongeni fiti pungun annuk won fansoun pisekin, imwan pwan ekkoch sakkun pisek; a pwan tongeni amomo, ika mumuta an epwe chok kamo nupwen aea, ika aniwini pisekin kewe nupwen fansoun ewe Board a mefi pwan mei murino seni an angang;

7) forata, tumunu, amokutu ika fori ekkewe angangen sopai epwe tongeni afisata ekkewe popun ewe authority a mwochen, pwan angel monien ekkewe angang, iwe ekkewe moni mei tonong epwe nom non monienapen ewe authority;

8) fori pwan eani ekkoch kontrak, ika pwan fori ekkewe sakkun atipeew ren pekin angang epwe namot ngeni ewe angang; me pwan ekkoch napanap a mefi epwe murino;

9) epwe tongeni paro moni non ekkoch fansoun, nge an ewe Authority kewe niwinimang esap pwan an ewe Muun Chuuk ika an ekkewe kinikinin muun non Chuuk pwan met monien me pisekin ewe Muun Chuuk me kinikinin ewe Muun Chuuk esap pwan tongeni aea pwe kamusen an ewe authority niwinimang, chinon chok ika pwe mei affat non annuk;

10) awora pwan angel niwin ika fees me pwan mon pisek mei kamono, me non angangen ewe Authority a fori, chinon chok niwin ika fees esap wor epwe fori ika kawor epwe napanapen ew takisesi aramas, ika takisesi chon aae ekkewe pisekin Muun, ren met tufich mei fis seni ekkewe pisek an ewe angang, nukun chok ika pwe mei mumuta seni annuk;

11) fori fiti pungun annukun ewe angang; ekkewe meinisin taropwe mei auchea ika namot ngeni popun an angang;

12) fori ekkewe ekkoch angang me eani ekkewe sekining mei namot ika murino ren aoponueta an kewe angang me wisan mei affat me ren annuk; pwan

13) apungano napanapen, katoun me annukun angangen ewe Authority.

Tetten 6. Kapung me Tupun non Kapung.

1) Ewe Authority a tongeni kapung ngeni emon non pusin itan, me emon a tongeni kapung ngeni; nge mettoch ika niwinimang an ewe Authority nupwen ese fori an ewe Muun Chuuk angang, iwe esap ewe Muun Chuuk epwe eani ewe sekining.

2) Ewe Attorney General non Muun Chuuk epwe wisen tupuni pwan anisi ewe Authority non pekin mettoch mei fiti annuk, chinoon chok ren met mei wor an conflict of interest won, ika met mei wenengeni.

Tetten 7. Nemenem.

1) Ewe Authority a ngeni ewe Board an epwe angei, annomwu me tumunu, atouu moni ika pisek mei kawor ngeni ewe Authority seni ekkoch pekin angang. Ewe Authority mei tongeni aea. napanapen an ewe Muun tumunun taropwen moni, ika pwan ekkoch sakkun napanapen tumunun taropwen moni mei foruta seni annuk ren pekin angangen kompeni.

2) Ewe Authority mei tongeni kamo an pisekin ofes, pisekin angang me ekkoch sakkun pisek non an pusin napanapen angangen kamo ika an muun, ika meni chok sakkun napanap epwe efich.

Tetten 8. Budgetin Ier. Ewe Board epwe fori pwan atononga an ewe Authority budget iteiten fiscal year, non met napanap mei affat me ren annuk, usun chok a fiffis ngeni ekkewe putaen ewe muun nupwen ar fori pwan atononga ar budget. Ese mumuta an epwe katou me nounou moni mei watte seni ukukun mei kawor, nge ren tipisin epwe usun chok met napanap mei fis ngeni ewe Muun Chuuk.

Tetten 9. Executive Director. Epwe wor emon Executive Director non ewe Authority, epwe finita seni ewe Board, pwari nomw fan nemenian. Ewe Board epwe wisen fori niwinin ewe Executive Director. Ewe Executive Director epwe wisen tumunu angangen ekkewe programs me projects me pwan ekkoch angangen ewe Authority, iwe epwe pwan tongeni atononga, finata, nemeni me atou chon angangen ewe Authority, fiti pungun me ren annukun chon angang ewe Board epwe forata, nukun chok meta a apasa non Tetten 10.

Tetten 10. Budget ika Finance Officer. Ewe Executive Director epwe wisen finata emon Budget ika Finance Officer, *fiti tipeewin ewe Board, ren napanapen ewe wiis epwe pusin affat me ren annuk. Ewe Budget ika Finance Officer epwe wisen angei pwan atouu monien ewe Authority. Mwen an epwene fori wisan kewe, epwe akkom fori ew monien pwon non wisan we esap kukkun seni \$10,000, ika watte seni ei ukukun a foruta seni ewe Board. Ewe ukukun monien pwon epwe for me ren ew ika chommong ekkewe aramas ra tongeni fori ewe sakkun, ir mei mumuta ar repwe fori ewe sakkun business non Federated States of Micronesia, iwe napanapen taropwen epwe kapunguno seni ewe Attorney General non ewe Muun Chuuk. Ewe Budget ika Finance Officer epwe fori wisan fan nemenien ewe Executive Director.

Tetten 11. Taropwen Moni. Ewe Board me ewe Executive Director repwe chufengon ne nengeni pwe ewe Budget ika Finance Officer mei tumunufichi taropwen me puken moni, epwe fat moni tonong, moni tou, pisekin me monien me pwan an ewe Authority niwinimang, pwan pachenong sakkopaten pekin me monien ewe Authority. Ewe Board epwe fori an repot ngeni ewe Kepina me ewe Speaker non Legislature, esap mang seni one (60) ran me murin saponon ew fiscal year, non ewe report epwe affat met ewe Authority a fori non ewe ier, a ifa nonnomwun ewe Authority non ei ier, pwan met kan ewe Board a mefi pwe mei murino an epwe repotei. Ewe State Auditor, nge ika pwe pwan wor emon, iwe ewe emon mei nounou naisenin cheki monien business, epwe finata seni ewe Board, an epwe wisen cheki ika nengeni taropwen ewe Authority iteiten ier, iwe epwe repotei met a kuna, ngeni ewe Kepina me ewe Speaker non Legislature.

Tetten 12. An ewe Authority Takises. Fan aukukun ewe nemenem ren for takises ewe Pekin Fori Annuk non ewe Muun Chuuk a tongeni fori, ewe Authority epwe pwan nomw non tettenin ew ekkewe pekin angangen muun, iwe epwe kepichino seni takises, usun chok ekkewe pekin angangen muun, ren an angang a pwan usun chok ew angangen muun. An ewe Authority angang a usun chok ew angangen sopai ika business, nge ewe Authority epwe iteni pwe ew angangen sopai ese wor winan, ika mei non-profit.

Tetten 13. Annukun Choon Angang.

1) Ewe Authority epwe pusin forata an annukun napanapen me tumunun noun chon angang, esap pwan fiti ewe annukun chon angang an Muun Chuuk, ika ewe Truk State Public Service System. Ewe Board mei tongeni fori non

an tungor ngeni ewe Kepina ren an epwe pwan pachenong non ewe Truk State Public Service System fan asengessin noun chon angang, nge, ika pwe ewe Authority a mochen pwe epwe pachenong, iwe ewe Board mei tongeni finata ekkoch sakkun wiis a mefi pwe mei auche ar repwe kepichino seni ewe annukun chon angang an Muun.

2) Meininisin chon angangen ewe Authority, pwan pachenong ewe Executive Director me ewe Budget ika Finance Officer, ika pwe ir ra tongeni chok sopeieno ar kewe tufich me pung nupwen ar angang ngeni ewe Authority.

3) Ewe Board, mei tongeni ngeni noun ekkewe chon angang tettenin niwin repwe niwinini me ekkewe sakkun tufich repwe eani non ekkoch kinikin ika non unusen seni ar mei pin angang ngeni pekin muun me nom.

4) Ewe Truk State Government epwe awora ngeni meininisin ekkewe chon angang ngeni ewe Authority me nom, ekkewe ra tou seni ar angang non iteoch ekkewe tufichin angang seni ar pin angang ngeni ewe Authority me ar pin angang ngeni Muun, usun chok ekkewe tufich repwe angei nupwen ar angang ngeni ewe Truk State Government me ewe Trust Territory Government.

Tetten 14. Asinei ngeni ekkewe Municipal usun ekkewe Projects. Ewe Authority epwe achocho ne asinei ngeni ekkewe municipal government ika muun fonu ekkewe projects epwe no-ngenir non fansoun mei tufich, iwe epwe pwan sopeieno ne akkasinei ngenir unusen aramas met porausen ekkewe projects ika mei akkasiwin non ar atoot.

Tetten 15. Kuten Fonu me Aninisin Kuten Moni.

1) Nupwen fansoun ewe Authority a mochen an epwe aea fonuwen ika pisekin aramas, iwe epwe fiti kapasen Annukun Chuuk No. 2-1 me Sopun 10, Itenap 67 me non ewe Trust Territory Code. Ewe State Government epwe wisen ani sekining ne kut fonu me aninisin kut moni.

2) Ewe Authority epwe muttir esinei ngeni ewe State Government fansoun a mochen aea ika angei fonuwen ika pisekin emon aramas ika fonuwen ika pisekin ewe State, ika ewe Public Land Authority. Epwe affat non ewe taropwen asinesin fonu ika pisek epwe aea ika angei, popun an epwe aea, nangataman fansoun anepwe aea, napanapan akkasiwin ika pwe ese fis ewe mochen, me pwininmaram fansoun epwe poputa aeaen ewe neni ika pisek. Ewe State Government epwe wor anpuung non fonuwen aramas ewe Authority a angei ika aea, nukun chok ika pwe mei wesewesen affat non annuk.

Tetten 16.

a) Kaworen Moni. Ei ukukun \$25,000, ika fite ukukun epwe tongeni naaf, iei a kawor seni ewe Monienapen Muun Chuuk ran fan asengesi monien me niwinin mwokutukutun me angangen ewe Lower Mortlocks Development Authority. Ei ukukun moni epwe no-ngeni ewe Lower Mortlocks Development Authority, ewe epwe wisen tumunu mwokutukutun ei moni ren an epwe chok fiti metewe popun mei affat non ei Tetten, pwan fiti pungun ewe State Financial Management Act, iwe esap pwan wor moni epwe nounou epwe nap seni ei ukukun mi kawor. Met moni esemwo it ne nounou non September 30, 1985, epwe niwinsefan ngeni ewe Monienapen ewe Muun Chuuk.

b) Ewe Lower Mortlocks Development Authority epwe awora an repot ngeni Legislature me mwen April 15, 1985, epwe affatatiw:

i) tichikin porausen nounoun ewe moni mei kawor non Tetten 1, pwan affatatiw ukukun nussun mei wor non April, 1985;

ii) affata met anapanapen nounoun ewe moni mei wor non April 1, 1985, an epwe nounou non nussun ewe fiscal year nge och sopusopun repot won nussun ewe moni epwe pwan kawor nefinen 20 ran me murin saponon ewe fiscal year ngeni ewe Legislature ika ew committee mei wenengeni epwe affata usun nounoun ewe moni; pwan


iii) awora met anapanapen moni epwe kawor ren ewe Authority non Fiscal Year 1985.

Tetten 17. Poputan Pochokunan. Ei Namopung epwe poputa pochokunan fansoun an a kapunguno me ren ewe Kepina, ika fansoun an a pusin winiti annuk won pusin winikapan.

Sain seni:


Simon Innocenti, Speaker
Truk State Legislature

Annetata seni:


Datasi Albert
Legislative Chief Clerk
Truk State Legislature

Pwinin maram:

Jan 21, 1985

Kapunguno seni:

Erhart Aten, Governor
Truk State Government

Pwinin maram: